

花
宜
館
詩
鈔

花宜館詩鈔卷之九

錢塘吳振械宜甫

古今體詩六十二首

起丁酉秋
盡戊戌冬

李海帆廉訪

宗傳

海上釣鼈圖

蒼蒼茫茫海濤起閒閒寂寂釣絲理礧溪嚴瀨皆已矣
突兀千秋謫仙李掀髯一笑連六鼈斬蛟射虎皆非豪
豈知遊戲亦偶耳萬事何足爲名高日月所出我所遊
人間幻態看蜃樓睡起狂吟遣愁寂秋潮倒飛作霹靂
思君太白星夜明招之不來杯獨傾幾時共醉跨鼈背
手把芙蓉朝紫清雲荒霧積聞吟嘯我無長綸不能釣

情深恥作鯨人泣技薄終令龍伯笑井蛙局促何足尤
郭璞傳井蛙何足量海鰲而我已是忘機鷗看君努力立四極竟欲
歸釣西湖秋

又題望峨眉積雪圖

聞道峨眉雪飛從龍漢前有時作春水萬里送吳船凍
合巖頭月青留鳥外天何當依古佛擁衲看經年

抱犢山人四友圖

塵壒日以遠草木日以親品植豈不殊相賞各有真昔
者抱犢叟垂白爲田民百年永相保保此山中春旣念
臭味合遂挽風氣醇不見冠帶場結交從貴人孤芳揜

養萊古道生荆榛

萊州三忠詩同陳元圃孝廉

起作有序

明贈太常卿朱公名萬年字鶴南貴州黎平人
萬歷舉人歷官萊州知府崇禎四年遊擊孔有
德援大淩河至吳橋兵變回戈東指所過州縣
皆殘破萊民驚竄公下令嚴禁飭器械儲軍食
爲守禦計賊至萊不攻而東陷登州明年二月
來攻萊州公出奇拒敵數月不懈會朝議主撫
賊詭乞降命公往受之公曰賊破城殺命吏自
知法不赦必不降且未經大創志甚驕往則徒

損國威耳然知府爲王臣此身不敢惜也遂行
果爲賊所執公紿之曰我能爲若呼守城者出
降賊以精騎五百擁公至城下公大呼曰我被
劫誓必死彼精騎盡在此可發礮急擊之無顧
我守將楊御蕃猶不忍公頓足大呼賊怒亂傳
刃大罵而絕城上見公死遂發礮賊精騎燬者
過半時七月七日也

萊州一城如彈丸賊攻七月城獨完盟忠誓義經營慘
能合一城爲一膽賊氣方驕豈就撫徒損國威事何補
受命而行就死所義不避死官守士以降誘賊賊不猜

擁以精騎城下來大呼城頭速擊賊賊怒公語刃橫臆
須臾烟燄蔽天黑五百精騎一礮殛桓桓智勇安可得
死後猶褫虎狼魄君不見嘆血罵賊血模糊常山睢陽
世豈無太守者誰烈丈夫公每語人曰生爲奇男子死爲烈丈夫萬年其
名其姓朱

明贈兵部尙書忠烈徐公名從治字仲華浙江
海鹽人萬歷丁未進士歷官右布政使請告歸
養起薊州兵備尋加左布政使復移疾歸里崇
禎辛未起山東武德兵備會孔有德叛陷登州
遂拜都察院右副都御史巡撫山東兵部議上

方畧曰萊撫駐萊濟撫駐青公以萊爲山東屏蔽無萊則青濟皆危乃馳入萊與萊撫謝公同日受事爲死守計兵部主事張國臣奉撫議出遣使爲賊求撫公大罵曰安得上方劍斬此大姦細乎屢疏言不可撫狀且言臣當死爲厲鬼以殺賊不敢以撫謾至尊疏入不報四月十六日賊礮擊城西南隅甚厲公方簡閱丁壯左右請少卻公曰不可語未竟中礮死

活囚四萬六千人

勦白蓮教事

築隄八萬七千丈

知桐城縣時事

生

平治績在人口一死英靈滿天壤濟撫駐青非駐萊圍

城入守何爲哉尺寸必爭吾土地豈肯卻避徇朝議無
萊卽恐無全齊以死扼賊賊不西賊雖善攻我善守壯
哉男子世無有公語金一鯨曰賊善攻我善守我不能守此城不第男子天昏日慘
血漉漉礮火光中萬家哭噫吁嘻死後殺賊願爲厲恨
不生前賜劍殺奸細

明贈兵部右侍郎謝公璉字韶石湖廣進士歷
官巡撫以事繫刑部獄孔有德陷登州詔逮巡
撫余大成出公獄中擢登萊巡撫指蹤方畧竭
力守禦張國臣承柄臣意爲賊求撫公荅書云
城下之盟必不能從其後徐撫死督理兵部侍

郎劉宇烈畏賊不進力主撫議齋僞旨命同朱
公萬年出撫賊賊謬爲悔罪狀公信之次日推
官屈宜揚復請出城讀詔遂被執至登州死

千七百里九日至

公受命自京至萊僅九日

介馬而馳入危地象人

愚賊隧道平布囊實土重城成

事見平叛記

當時一心誓死

守蒼書早恥城下盟議撫百口同一辭援兵再潰城不

支亦知撫賊必死賊云不可撫孰信之不然屢疏血淚

迸未聞促戰來王師姑以一死警聾聵或者救救孤城

危裹屍馬革自素願以撫而死心逾悲吁嗟乎忠奸不

同生死別死公竟不死宇烈

賊是日本欲見宇烈宇烈懼被劫不果往

冬夜作簡沈友香

濂

陳元圃

超

陳曼士

鑑

冬煖雪霰稀北風吹微雨冥冥鬱巖岫
槭槭黯檐宇一鳥將數雛嗚呼惜毛羽
折若焉可巢窮栖將何所青天覆四海
鸞鶴紛軒翥萬里去絕遠不復相爾汝

江離生窮渚幽蘭在空谷被蒙佳人愛
采采置華屋湛露莠春榮鮮飈扇秋馥
推移四時運榮謝乘溫肅莊生觀物化
老氏言止足賁重危昔榮神恬覲今福
清懷委枯桐母歎日月速

庭月有寒色嘉賓猶見從開酌申夕歡
酒味不在醲清談一何綺欣然解胸春
借問岡嶺間鬱鬱松栢桐苟非

抱堅操曷以陵霜冬弱水西向流蕩滴江河東東西詎可合白水心則同

元圃和予前詩獎勵逾分因爲二詩荅之

東海浩萬里春風馴白鷗昔君惠然來芳杜綠滿洲風流玉塵尾文采珊瑚鉤處爲癯饑吟而抱四海憂騶吾何般般鳳皇何秋秋念茲百族長懼淪凡衆儔

誓墓虛所懷紆我海濱轍比歲穀不登民窮政益拙涕洟向流亡忍此寸祿竊薄謫被

國恩感激肝肺熱佳人朝有貽鄭重瑤華折恐予怒如疔宛轉爲開說意摯非爲諛才限詎辭劣臣精矧銷亡

異日何施設飢溺三代民援拯望人傑

送元圖歸覲濟南卽赴禮部試

王修識童幼楊俊拔牧兒我昔守濟南目迷不予知詎
意窮海濱子來相娛嬉野航空其腹載車東渡濰我有
一瘦男黃犢非健姿計較豬與龍那免累月咎我從講
肄暇造談樂孤驕英風動戶牖子尤工說詩鉅細括百
家奇正測鼓旗義貫肉在弗語妙椎碎錐誰能舍子臥
欠伸夕忘疲盲風不恤物日夜自北吹林瘖啄雪鶴海
僵負冰螭陽和何時回慘慘痛裂肌而適被薄譴章服
忽見褫塌翼蒿艾間飛去將何時子留慰情話子去益

輞飢我意不自釋况弟子于師子豈忍去我倚閭親衰
羸更聞上計吏夙駕不得遲鄭州城荒荒雄州水瀾瀾
寒沙入幽薊京國路透迤京國蔚賢達著作作其職司八
伯盛歌唱靈祇下窺覲下集萬國彥鱗羽萃天池莫言
跼萼繁若木赭九枝莫言沼沚澄江河橫地維合金冶
軒鼎伐山通禹樑自從乾嘉來斯事聖者誰衆奏自繁
會雅頌焉可虧嘗觀子所作氣雄出孤羆秀者芙蓉華
何假雕飾爲天門闢九扇金玉爲階墀翱翔勉自力遠
與嚴馬追語采風謠新事據紀傳遺在朝金與石在野
管與絲

六聖二百載盛業流淳熙吾衰不任此子今其庶幾此
行適我願何用苦繫維珍重慎自愛門外路有歧

歲暮雜興八首

庶草榮枯轉眼非天心人事每相違城頭日落狐狂嘯
海上風高鷁退飛未議徙薪慚失策苦聞懸磬病啼饑
紆如街鼓從推去父老無煩動累歔

楚弓得失漫斷斷變幻須臾指白雲墮落早憐仙小劫
排根不信吏深文思從野老田閒話難忘釣天

帝所聞恩重

兩朝頻感涕起看

紫極氣氤氲

螭頭舊侍

玉宸朝斂版風塵歎寂寥豈有微才能報國空將壯志
付題橋半生匹馬馳驅路故國雙魚早暮潮遙致親鄰
無別語妄心如膜已全消

簿領人輕近替權海靖相狎獨悠然讀書枉羨如神筆

從宦偏慳使鬼錢惘惘妻孥可憐色蕭蕭風日最寒天

且容鼾睡他人榻

時新政
尚未至

夢繞紅亭醋庫前

在菜市橋
東見咸淳

臨安志計其地
與敝廬相近

重埽蛾眉意已慵承恩無地若爲容貴人衮衮施行馬

末俗紛紛好畫龍垂老生涯貪大藥尋幽心事向枯筇
故交書共梅花寄傲我湖樓臘甕濃

哀樂相尋涕易揮清商揜抑悵琴徽百年日月蜉蝣短

永夜江湖鴻雁歸老我顛毛傳座酒驚心刀尺上天衣

在萊四年喪一女五僕一幕客聊相慰藉山無恙拄笏寒晨向翠微

句裏光芒腕底魂武林耆舊幾生存敬鄉心擬吳師道

傳硯名慚范伯孫

時刊先大父杭郡詩輯及棧續緝詩凡七十八卷甫畢

千古文

章多謫宦六橋花月斷清尊

汪小米結東軒吟社前後百集棧嘗追陪其間今吳

子律梁久竹錢蕙臆諸秋士及小米皆下世矣清尊集者所刊泚中詩也西州門外他時路

華屋山邱總涕痕

恐惱比鄰莫放歌
涸陰鄉裏苦寒多
極憐舊業無蝸舍
故鄉老屋不堪棲
止欲謀移居未得
未用人情問雀羅
詩責兒曹荒幼學
醫窮小婦負沈痾
欲書驢券商歸計
磴雪河冰奈遠何

去萊州與父老別

寡識政易乖曠官歲已久
愧負父老多父老愛我厚
飢羸今何如忍飲卮中酒
驅車復驅車淚濕道旁柳

濰縣與林秋厓明府

士駿別林與余
同罷官

把琰休歌棄婦詞
恐君禿盡鬢邊絲
白狼河上青青草
惆悵春風似舊時

偶成

暫解朝紳靜拚扉故人玉札近今稀
柳塘盡日濛濛絮還傍東風上客衣

雜詩

皇塗清且夸驚駿相爲伍峻阪忽僨轅
十駕徒自苦搆厦匠庀材大小各有取
棟梁假蒿艾終憂敗風雨壯夫乘長風
破浪快帆艣豈知萬里流中有沈舟渚
量盈器易敝道昧境多阻懷哉稷與契
慎弗輕自許

寒者思菽桑飢者思食棗鷄鳴百憂生
枕席令人老我有數卷書讀之恨不早
避俗心自澄始知山中好自治苟不力
榛芳何由掃念茲炳燭光寸陰以爲寶

貞木無曲枝貞弦無淫響本性物有然匪求耳目賞君
子崇令德穆然黃虞想今人多謗傷昔人亦已往百年
何所求琴歌聊自廣苟非相知深功業豈鹵莽黃屋方
側席薦善在宏獎握髮吐哺心赤舄吁可仰

宿淄河哭鴻治

潘楊情好敦婚宦肇蜀徼

君爲秋樵從父女夫乾隆乙卯後吾父及從父與君之祖

若父皆宦于蜀

人間歲月短追往益悲嘯弱冠遊京師相攜喜

同調歌樓恣酣嬉花市約遊眺旁人笑相指跌蕩兩年
少君善爲文章能闢古堂奧瘦語削寒鐵取曲不嫌拗
予旣籍承明君亦秋解噪數從計吏來荆玉光未耀門

戶方中衰無地遂耕釣因爲寫書官黃綬求自效三版
心自虔五斗骨難傲瘦奴擁裋襦陋室蔽蓬藿衙參旅
進退齒冷無理鬧十年得小縣喉轄三郡要往來織車
馬候人日相告供帳亦甚艱僻陋尙貽誚比歲穀不登
春旱接秋澇流亡溝中瘠強黠村頭剽舉債佐官錢買
穀平價糶概量示均平蟻衆靜不譟旣用恤瘡痍亦以
息鈔盜經營實勞勞安集乃稍稍不見道旁碑墮淚到
童髻冢墓桐鄉祠畫像汝南造古今去後思德政同表
暴拯荒在乙未丙申之
間碑則近日所建又聞理冤滯臨事心無躁上官
命慮囚奉檄征車膏夜堂犯嚴寒病入精氣耗未與妻

子訣竟赴上帝召

奉調至省鞠囚日夜不得休息遂病歿于邸舍妻子在臨淄未及見也

生已塵甑傷死恐葛帔悼九原債可避八口飢難療誰
言仕宦樂但可黔婁較昔我寮所部君來心所好每從
淄水渡驛舍君必到越酒爲我沽吳羹爲我芼輒言少
年時盛氣食虎豹安肯一室中低頭事灑埽傾家博一
官曳尾入泥淖牛驥嗟共牢嬖施反憎貌不爲威鳳翔
而作寒蟲叫平生恥言媚遑問奧與竈侵尋失少壯短
髮雪侵帽換縣且未能看人擁旗纛語罷傾百觴意氣
尙籠罩南有天齊淵怒泉噴石竅甚我往觀之奇境性
所樂已屏騶吏喧但許邨叟導茶烟石亭秋共聽琴筑

妙日月曾幾何嗟爾夢先覺山川固依然室宇仍窅窳
無復黃馬談遽作青蠅弔何須感鄰笛淚已長河倒迢
迢望山陰歸程細檢校江河隔風濤蒙沂雜山嶠諸孤
依病母遺卵艱啄菹攸喪實賴繇原亡乃託瑁哀哉今
之人高義庶幾蹈檣車忍滯留何時返素旄

劉眉生方伯

斯嶠

招看海棠枕上聞大風雨作二

絕句

枕上東風一夜狂不知減卻幾分香春陰也是尋常事
可惜無人拜綠章

十年栽種始成陰費盡紅闌愛護心若使尊前風更雨

別愁還比落花深

方伯將入覲

文園爲如皋汪氏別業二十年前文酒之會頗盛

今已荒落矣曉堂司馬

承鏞

以舊圖相示爲題

二詩

退宦烟霞契江南水竹村漫悲耆舊盡猶有畫圖存帆影移蘿幌鶯聲傍玉尊百年遊賞地重向客中論

望衡情不厭就汝嵒山湖湖上應遊遍春來似畫無征

塵愁斥候

曉堂將有轉餉之役

鄉夢逐鷗鳬埽徑他年約花前選

策俱

爲海帆廉訪題畫二首

峨邊禽蠻圖

十三支夷剽西邊殺人如麻血成淵何人持重不欲戰
雕戈畫斧行遷延饜以金幣直賞亂擁兵自衛尤可憐
先生躍馬氣何壯自募僈突開武帳馬前大旗十丈紅
捉生猛士袴褶從蠻酋衿甲坐鼓下壺漿四野歡聲同
惜哉金符不在手不然埽穴收奇功佳兵不祥語誠是
縮胸將母國所恥烏喙有毒非漫嘗用之得當痼疾已
堂堂節鉞制一方忍以赤子委虎狼藏頭郤間覲無事
朝廷威命何由揚近聞邊師大克捷旄牛徼外兇魂懾
回頭風雨國殤多幾度陰燐上荒堞當日何人重老謀

花宜館詩鈔

卷九

三

空留感憤詩盈篋

廉訪軍中詩一卷多感事抒憤之作

能縱能禽思葛侯

綸巾羽扇真風流後來勲業知誰似西望籌邊百尺樓

凌雲載酒圖

古人去已遠巴江無盡流西風帆江水復見凌雲遊羣鷺下松瀑萬山青寺樓樽前一高詠俯仰有千秋

寄翟文泉進士

云升萊州

萊人愛我似桐鄉況是情深翰墨場翦燭雪窗還往數攜琴花嶼嘯歌長具衰惘惘催行色祖道家家悵別觴投枕至今魂夢繞海雲紅處讀書堂

未能相就縛茅茨芳醕重銜定幾時懸帳淋漓數行字

分襟珍重兩篇詩情深蛩蛭誰能似悟到蜘蛛我已遲
千里瓜刀勤覓取尺書猶得展相思

文泉隱居不出以
隸書名生平不輕

爲詩而以二詩
送余意甚厚也

大姪春燾報罷南歸見予于濟南將別賦詩五首
愁予方蒞落盼爾急騰驤失意今相見無言默自傷
花春有淚斫劍夜無芒相骨真傳少悲歌共激昂

昔至東萊郡

丙申姪
嘗至萊

羈懷得暫寬今逢歷亭下聚語不

成歡涕淚招魂屢

余去年喪一女
今年又喪一妾

功名復玷難翻勞臨

別意再拜勸加餐

迢遞三千里征塵何日休嶽晴雲覆笠江暖雨隨舟孤

詞消殘燭歸裝賸敝裘未須悲別足且慰倚閭憂
寒烟桐隴曲宰木鬱清陰未遂誅茅願虛懷誓墓心雲
山將夢遠霜露入愁深獨返吾慙汝萍流恨不禁
爾抱鴿原痛孤兒幾尺長未能拋藥裹便恐廢巾箱過
小情當恕經疑語必詳庭階他日見玉樹喜成行

寄春木廣濟

縣屬黃州

向來楚蜀倦扁舟欲抱遺經老故邱

盛世才人空白首大江明月又黃州敬賢榻下周寥數
憶弟詩成杜老愁春雨泖湖芳杜長門前冷落舊沙鷗

濟南春日

池館花飛客恨長百年潦倒鬢初霜功名易退邱靈鞠
姓氏虛傳盛孝章月色故園三五夜酒杯高興萬千場
誰憐留滯華山下獨臥春風局腳牀

移居城東

富貴何必金谷園神仙何必桃花源地偏心遠涵妙理
卜居欲與靈龜言城東老屋極閒敞野樹圍綠成崇垣
吟詩貧孟頗可學家具借載雙短轅查查山鵲噪晴曉
亟埽庭戶除籬藩佳花秀竹苦未種但有瓠葉青幡幡
郭門相望不百步名泉十數沿城根是名水樂勝絲竹
倚樹可以娛朝昏病孱憚暑未敢往下簾勸我蟲雷喧

連朝蘊隆旱太甚上腴往往成荒原玉女池頭乞聖水
神龍何日來蟠蜿赤足踏冰不可得墉房元轡誰飛轡
吾將臥風北窗下門外熱客迴高軒

時久旱酷熱官吏至太山取水禱雨

書感

蒼茫風露夢瑤京八尺桃笙似水清杳杳仙山迷遠海
娟娟涼月耐長更黃楊竟厄今年閏紅豆難拋往日情
衰鬢不堪振觸處夜來鸚鵡隔簾聲

夏日濟南雜作

七橋明月一湖花況是青山對鵲華故里何須問松菊
吾生聊可繫匏瓜逢人野話消清晝望遠微吟送落霞

自是浮雲無定著側身天地莫長嗟

來去無端逐燕鴻十年陳迹感飄風使君林下人何處
名士軒頭酒早空撫髀漸傷絲鬢白鳴騶驚避陌塵紅
江關詞賦餘蕭瑟流播他時說寓公

稚川何事又移居僻巷應無過客車三徑亦思元亮井
五湖未讀計然書茗爐清課林風細衣袖新涼幌月虛
莫謂小齋蝸一角絕塵真擬小方諸

蜉蝣身世苦經營靜後心同止水清短榻當窗新樹色
輕衫繞郭亂泉聲詩朋頗喜酬妍句醉尉今能察夜行
好是日高容睡足閉關嬾漫稱平生

少伯元圃鄒蓉閣

在衡

俞四香

浩

各示和章疊前

韻奉荅

朝暮衰榮日及花一篇齊物悟南華敢思佳境如都蔗
已料浮生似朽瓜穀貴偏慳東海雨鄉遙空望赤城霞
棲遲濩落甘吾分翻遣親知動歎嗟

東遊纔識五噫鴻幾度南藤坐晚風失意名場文字賤

元圃報罷方歸

攜家遠道俸錢空

少伯春屬方來自博興甚苦貧乏

耽吟易斷

衰髭白卻疾常防醉頰紅

元圃近以疾止酒

各有辨才能說法

只憐頑石負生公

兒子春杰先後從兩君讀書

人生只合故鄉居千里如何數駕車飄泊全家愁儉歲

蓉閭杭州人四香海甯人今眷屬皆在山東

窮愁一意著奇書

四香撰西湖域考古錄

波沂月歸須早硤石耕烟願久虛不爲買山錢未賜鷗盟鷺約肯忘諸

諸公揮翰靜無營洗玉功深句律清百變旌旗誰大敵千秋絃管有中聲及今開社休嫌晚翻幸拋官未遽行夕諷晨哦閒事業莫教愁傍酒杯生

水磨

築石闌水水受磯失勢一落如潰圍水中大輪三十轂衝激儵忽行如飛下輪上磴一柱貫輪旋磴轉無相違不須輟炙膏與脂前莫與挽後莫推雷風交奮出奇響

日月疾走無停機水流不方但圓折盤渦蹙碧跳明璣
不杵不臼米出甲屑玉萬斛晴霏霏自成精鑿匪人力
杜公巧製誰能希昔人豪橫殖生彥妨民灌漑家自肥
今人生計嗟日微撈掠聊免鉛春悲未須劉頌禁侵害
莫與衛尉同譙譏水聲激激寒生衣北方有此吾見稀
瘦驢幸免踏陳跡東風貫耳鳴斜暉

憫旱

一漑無功暑似焚鳴鉦伐鼓日紛紛村人編柳覆首鳴金鼓昇神佛入城
禮雨定知東海無冤獄何事西郊但密雲畊父清冷囚未
得井龍乖迂禱空勤郡縣井有竭者醫創剜肉村農泣府寺深

沈恐未聞

種瓠

灌園新得樹瓠法碧色幡幡開嫩甲延緣弱蔓卷青絲
枯葦周遭瓦盆插濃濃露下夕氣滋涼秋取實當纍纍
以割而斟儷大斗未知能容五石否自憐小戶天所限
但可酌水莫酌酒不然去毛弗折項爛蒸食之適吾口
吁嗟乎匏瓜上應星文重濩落終憂世難用萬事休論
材不材區區草木供嘲弄君不見張府君如瓠壺外雖
肥澤中實粗又不見齊居士瓠無竅其堅如石徒姍笑
腰舟慎弗誇千金中流利濟誰能任

余宦遊齊魯間凡六七年率于吏事未嘗一蹕天
門日觀之勝戊戌閒居濟南自春涉冬一室周
旋彌益嬾情旣而將之京師遂決意先遊泰山
遊事畢然後北轅未晚也吾鄉姜玉溪恭綬方
宰泰安因以詩先之

名山在眼不得遊抗塵走俗爲神羞每因鞅掌自解說
無官不往今誰尤十月急霰鳴瓦溝具裝搜索青狐裘
夢魂昨夜已先到天門直上風颼颼玉溪詩人劇風雅
郵書急脚從之謀勿呼馬奚索官馬我已遣借烏犍牛
不然驢券書亦得橫騎倒跨容夷猶青芻白飯定不靳

更煩下若沾盈甌酒酣高興遂孤往擁琴便可從稷邱
白雲五十盤道古秦觀吳觀窮其幽胸中梨棗君已種
刀圭之藥非所求負鉏老父儻相見當覓神枕爲君酬

登岱三首

太山何高高百疊秀雲巘日色開鴻濛萬象破偃蹇仙
人駕海濤樓闕出晴晚古來登封者零落不復返悲哉
馬相如文筆空婉婉

袖拂天門霧手攬絕壑烟山勢如蒼龍東方走蜿蜒人
行龍背上衙衙欲登天樹老長不死安可問歲年不知
何處松種自秦皇前

白雲甚有情招我嶺上宿襪被就道人雲中幾茅屋鐘
咽了不聞階泉亂琴筑斜光下封中松門聚寒綠吳練
那可尋空勞望遠目夜半知有霜天鷄鳴斷續

趙北口

霜花打車篷晴影開水鄉叢蘆大柳下三五皆漁莊河
冰白礪柯凍鴨不下塘聾翁坐負曝羣稚嬉其旁觀此
風景好江湖夢難忘做緼亦自煖薄酒亦可嘗如何歲
將盡雙轂行未央

喜遇舒蘇橋大守

夢齡

憶昔濠梁上莊休從惠施

癸巳識君于濠州

一官同濩落六載

復棲遲

君時亦罷官至京謁選

碧琅花前筵紅爐雪後詩異方行

樂急莫遣鬢添絲

既至京師賃居宣武坊南圓通觀小屋三楹几榻
書卷之外無長物也殘冬風雪門庭寂然余又
性懶疏于酬接往往經旬無客過獨坐長吟頗
有蕭然物外之意

長安車馬日怱怱閉戶蕭然味不同小甕酒香微雪後
殘燈人影亂書中聞鐘已覺消諸妄投刺何煩溷乃公
餐飯漸加眠亦穩安心是藥別無功

花宜館詩鈔卷之九終

花宜館詩鈔卷之十

錢塘吳振械宜甫

古今體詩七十二首

起己亥春
盡壬寅冬

雜詩

貞木有直理貞絃無豔聲不逐衆人嗜乃崇千載名
猛炬入幽藪神姦憎其明莊容登廣筵衆醉惡其醒
託賤謗易集居高勢相傾波濤在人心百險無一平
古來逃物外用意慕沈冥

誦經忍飢飭雞鳴屢風雨由來巖陸中蕭悴無好語
匪食槩與梅中腸自酸苦人心輕白望國勢杖羣輔
元公

調周鼎吐哺風已古

金以利能斷水以淡相浹管鮑貧賤交風義高岌業後
人多寒盟雞壇血空歃談笑生春陽胷中滿鱗甲谷風
何淒淒三復淚承睫空山無居人麋鹿欣可狎

黃樹齋與郭羽可儀霄同里同舉於鄉羽可以畫
竹名因屬爲長卷而貌已及羽可於其間爲竹

林二友圖

無竹使人俗趣深語非淺苟非得其人俗豈以竹免吁
嗟文湖州韞材欲盡翦自非老髯仙下筆那足盼君能
師眉山言語天下選生平風雨心獨與老可善泊然榮

落外相賞略軒冕以此求同調千載甚矣鮮輒歎晉七
賢濫廁無人辨竹意豈其然俗客終須遣

舒蘇橋牛山種樹圖

牛首山在巢縣蘇橋爲巢
令建講堂其上種樹無算

居鄭城中十萬戶敬君如神愛如父蒲鞭掛壁不復用
起看春山新過雨呼奴種樹高復下白木長鑱力同努
遂開精舍集都講共琢新詞壽湖姥長官清貧自有樂
大松能吟柳能舞風土清淑心所憐別夢遠落江湖前
巢人思君今十年山中樹色應參天

記別

葉葉輕衣試薄羅海棠香裏月痕多當筵一唱斑駁曲

三月春愁滿玉河

徐州

百年旦暮歎蜉蝣車轍無端徧九州
坐看春風生白髮又題詩句上黃樓
呂梁月落河聲轉芒碭天陰樹色愁
那得脫身塵網外仙楂萬里溯崑邱

重至鳳陽

符竹恩榮第幾回

棧已五
任知府殿頭

溫詔愧非才濠梁未必魚仍樂城郭依然鶴
又來從古戰場多尙武祇今靈瀆易爲災
拊循雕敝真無術敢說官閒好舉杯

重遊龍興寺

樹石摩挲記舊緣南風吹暖麥黃天一官左降人將老

七載重來佛亦憐畫卷蛛絲封敝篋

寺藏明太祖畫像

江山龍

氣散晴烟刹那便有滄桑感不話前朝已惘然

寄蘇橋徽州

千里褰帷麥雨寒江南風物數新安春濃好賦花遊曲

事簡權充墨務官

徽州守率製佳墨餽客故云

舊夢詎忘淮水上

君兩守鳳

陽鄉心常隔楚雲端輪君咒筍成清興手刷香泥佐曉

餐

官廨在問政山麓產筍最佳俗呼問政筍

題官庶侯

思晉

畫淮南山水

畫君門前山畫君門前水我雖非淮人亦頗識其似君
昔遊滇復遊蜀好山好水俱爛熟南宗北派不復論畫
稿胸中貯千幅何不畫洱海之月點蒼雪又不畫鐵壁
關頭瘴雲熱不然騾綱棧道境絕奇瞿塘灩澦灘石磊
砢畫亦宜豈規遠勢憚苦辛而乃尺幅圖此爲人生鄉
里情最親鷗鳥白雲皆故人閉門蕭然斷俗想坐看
下筆歸真淳濠州太守鬢已皤皋亭南望空嗟峨長淮不
送客帆返奈此春風生綠波

龍興寺梅花

茅屋城中十萬間絕無半萼破春顏偶來古佛旃檀海

如見仙人姑射山淨色應呈獅子座餘香猶點鹿胎塼
清宵夢繞千林雪終擬西溪一棹還

咏鷺 有引

鷺水鳥也鳳陽春時則來棲林樹幾滿營巢鷺
子秋盡乃去然惟觀察太守兩官廨及城外龍
興寺爲然今年春分後一日鷺至以千計視去
年爲尤早矣

細數巢痕樹樹空纔看蘋末轉條風忽驚霜雪滿林白
何日江湖與爾同哺子銜魚勞手口呼羣掠水任西東
高樓翻笑樊籠鶴老向人前舞未工

郡中偶成三首

大柳高榆綠滿廊一春風雨冷淮陽年年沈竈憂蛙黽
戶戶張圖下鳳凰郡人多以畫鳳爲業食菜事魔煩摘發探丸斫
吏重周防敢言畫諾兼清嘯容易消磨晷刻長

病足蹢躅嬾出門偶尋荒寺一攜尊長波直下僧伽塔
晴嶺遙連禹會村老馬嘶鳴無壯志野花寒瘦盡愁魂
由來繁麗終消歇詩興惟從寂寞論

茫茫得失付鷄蟲草草光陰換燕鴻世味飽嘗黃檗路
故交悽絕白楊風向來通介羞隨俗漸解癡聾學作翁
方爲杰夜氣感人渾廢寢攤書還戀短檠紅
兒娶婦

宮庶侯蠻山校獵圖

俗吏治夷視羊豕良吏治夷視如子邊城無警里不譁
但輕徭役拋鞭箠山中以獵爲蓄畬官來約束成三驅
怒馬獨出從兩奴腰下長劍血模糊羣夷短衣兩耳鐻
犄之角之左右趨草間射虎弩白竹鈇勁直過毛胡盧
獻禽不忍私所獲壽君藤酒歌而呼當時豪氣壓蠻嶂
校獵圖成浩吟唱廿年潦倒成老蒼淮南月落愁相向
素髮頻添明鏡中好詩空繡弓衣上拔劍斫地歌莫哀
萬事由命誰能回可憐一障乘邊日已負長楊羽獵才
癸未余守大理君爲太和令皆由翰林改
官今重見于濠州前後相距已十七年

又題隨身一劍圖

亦儒亦俠亦風流萬里功名斗大州

曾爲蜀中刺史

老去閉門

飢欲死燈前雙淚落吳鉤

有餽江鄉食品者感賦

韭芽黃翦金芹芽碧抽玉竹萌
觶觶犢角新露濕香苞
春一束江鄉風味真可憐
杏花風後櫻桃前一從蕭條
住淮海便有萬錢無處買
今君愛我遠見貽欲膏饒吻
翻涕洟君不見貧兒斃草瘦如
腊賧銀不來朝復夕里
胥徵錢造草冊

書河亭雅集冊子後

并序

此康熙戊申三月廿八日吳玉隨程焦鹿董易
農汪荅文程周量梁藥亭王阮亭程翼蒼李湘
北陳子端李召林劉公誠諸先生小集玉河亭
紀事詩畫冊舊藏公誠家今僅有詩而圖已失
且阮亭玉隨焦鹿藥亭召林五人詩亦佚宮庶
侯游潁州得之市中因爲補圖按漁洋集作三
月晦日會者僅九人似誤

下朝軒騎恣盤桓河水春涵

帝澤寬此是康熙全盛日莫將杯酒等閒看

布衣華絨肯相親賭酒評花見性真春事玉河依舊好

近來提倡屬何人

零落丹青舊畫圖遊魚睡鴨爲追摹不知十四年前事

還有鵝溪一幅無

順治乙未諸公會宴集於此

庚子六月書感

烽火連閩粵鯨鯢恣吐吞冠紳淪異類木石泣貞魂荒
輿何由竄高墳幾處存

王師企時雨亟洗海塵昏

重臣誰守土聞警忍遷延

丹詔空諄切蒼生竟棄捐幾時收版籍何處問樓船防
海資雄略憂心正悄然

慟哭陣誰守蒼皇艦已焚孤城付文吏一死愧諸軍止
水臣心見陰天鬼語聞遙知冤憤氣不散海邊雲

舟山

百六十年雄建置

康熙二十七年以舟山爲定海縣以舊定海爲鎮海

浙東屏蔽

此孤城崑崙市舶終貽甌

明嘉靖間倭舟山陸路之兵伏于碇礮

海沸秋生三港路天陰鬼哭萬山聲出

羣才少安危重麾幟何時氣色明

舒桐之間山色最佳有南蔣耆地尤清曠而近峰

遙嶺重疊綿互烟靄萬態不能窮之以詞余凡

四至至必停輿小憩徘徊久之而後去殆有夙

緣者歟

岡嶺旣深秀林漱復疎做人言舒桐佳我更喜南蔣不知何因緣筍將數來往仰首紫翠中妙境滿襟想庶幾谷名盤或有川號輞閒閒山中人逍遙日攜杖烟霞自怡悅隨處足真賞征夫安及此目接終悄恍興適句易成風葉荅清響白雲知我心誅茅後來儻頗思從伯時畫本天所餉

書三清畫卷後

并序

王椒畦學浩舊見是卷前爲夏仲昭款後有屈杓陳憲章款蓋夏之竹屈之松陳之梅三人合

筆也不知何人割裂僅留太常半印椒畦復得
之以贈夏君介石仲昭伯兄之裔孫也介石之
子榮仕于皖出以相示因題其後

畫家誰得竹三昧有明頗重夏太常一枝一葉不苟作
兼金之價聞吳閭此卷合作得三友椒畦老人知最詳
可憐庸妄竟割裂卻幸妙蹟仍收藏畫梅不圓梅韻古
畫松不枯松氣涼屈陳風致並瀟灑更寫直節相扶將
腕底如發春雷聲能使百尺凌空蒼卽無半印亦可識
時無餘子能頡頏今年七月熱未歇午睡白汗如翻漿
忽然寒意動肌骨白雲翠霧滃滿堂北窗展卷坐復臥

得此消暑計甚良重君先澤留不得明朝空壁心旁徨

飲程氏隸隱園

秋晨出郭門雲木何森竦勁草不知霜寒綠尚被壟主
人隱蓬蒿不材甘擁腫小園一畝所花氣晴愈重樓窗
拓面面岡嶺盡騰涌我今解印綬暫喜置閒穴雖無絲
竹娛聊共山杯捧詩成多醉語豈爲茲園寵江聲風雨
來擲筆一神悚

余將赴黔送春煥姪歸杭州

涕淚不忍別北風江水鳴西南天萬里如爾豈能行几
杖方扶老

浣雲兄年
已六十

鄉閭況避兵蒲帆飛日夜急慰倚

閭情

舊從芍陂得數鶴蓄之年餘今以贈徐柳臣太守

思莊

於其去也以詩別之

芍陂春草如掌平白鶴羣飛飛且鳴閒庭荒圃忽相就
白石蒼苔殊有情池上秋晴敲雪簷纔闢蓬蒿已先往
相對能無白髮愁相看儘有青霞想竹王萬里蠻山中
我欲西南問土風山中毒瘴非爾習肯教辛苦隨樊籠
故人攜贈情繾綣歲歲巢居祝安穩他日相思夜雨同
人間小別西風晚爪泥何處不東西莫更援琴彈慘悽
腰纏十萬知無分但欲尸鄉老祝鷄

別皖中友人

皖公山下住經年乍挂高帆指遠天正欲愁時聞雁過
最難忘處是龍眠誰家團扇留圖畫排日芳樽損俸錢
一夜離亭風笛怨荻花楓葉總悽然

發安慶

柳禿蒲衰不似前攜家重上楚人船多情惟有沙頭雁
送我江湖又十年

余忠宣公墓

皇天厭元德羣盜中原起已發勝廣難遂決巡遠死危
城外援絕烽火環千里艱難障江淮心膽并婦子六年

戰守兼臣力已竭矣淒風雕宰木寒燐耿塘水清水塘守
墓間無人悲禽啼不止

江行口占

獨吟獨酌扁舟客何古何今萬里流鬢禿齒搖驚欲老
風清月白迴生愁騰騰秋煖香旂熟箔箔春深雪繭收
細筭百年歸計好片帆不向海東頭

湖口縣

一縣水聲裏蒼茫好畫圖厓根出樓觀帆影跨江湖望
極天無際吟成日欲晡船人拜神貺爆竹助歡呼

望廬山作

鬱鬱向誰語行行吾甚慵夜聞彭蠡雨夢落香爐峰未
作秫田計難忘蓮社蹤何時東林去雲外獨扶筇

小姑山

力當奔濤衝勢斷羣峰伍金焦兩點外奇挺惟此數由
來豪傑士砥柱濟艱苦衆險不可撼乃獨有千古胡爲
謔彭郎冷黛誇眉嫵

黃茅潭

四更五更天未明烏烏徹夜海螺鳴

邏者吹螺代柝

沙頭雨歇

江光黑已有嘔鴉打槳聲

舟行口占

百丈牽船犯曉寒腰環腳赤踏晴灘語兒莫羨風帆利
岸岸青山耐細看

雨泊分宜

章江西上路迢遙行到分宜始有橋借問鈴山人不省
斷林寒雨暮蕭蕭

袁州

霜篷只載客中愁甘脆何曾置兩頭日夜水聲雷鼓急
筒車多處入袁州

蘆溪道中

長年蓐食曉帆開灘急還憑短絳催水似妙文千百折

鷗如熟客再三來且貪暇晷搜書簞偶被新寒索酒杯
自笑非官亦非隱朝朝雲樹坐徘徊

上壩

外排萬枯椿中築石與泥橫攔或對東波濤爲町畦激
之緩者急拒之東者西來波高愈高去波低愈低有聲
無小鳴皆雷霆鼓輦小舟兀兀然如躡升天梯裊裊黃
篋簾一髮千鈞攜據地腰環環尻高首啄雞竹篙彎如
弓邪許衆力齊力盡不得進倒撞欲驚啼更懼舟觸椿
鉅若刀劍剗平流造奇險步步相排擠近程二百里浹
辰爲之稽我今齊得喪狎水如鳬鷖獨哀舟人苦相對

轉涕洟沽酒以勞之暮雪風酸淒

歲暮舟中感賦

扣舷低詠遣蕭辰枯坐翻於翰墨親綠樹芳洲思橘頌
清霜斷斲見楓人由來楚國多騷怨正憶明州沸戰塵
江上射潮強弩盡誰家歡喜歲觴陳

自四明被陷吾杭多移家遠徙者

移舟

漲落沙痕濶舟移水色渾遠山疑有霧疎樹不藏村已
覺身將老羞言舌尙存江潭逢釣叟風月自柴門

淶口

何處蒸湘劃上流輕舸容與向潭州雲連南岳窺朱鳥

水似西湖瀉碧油晚歲風霜多伏枕故人旌節擁鳴騶

未知撫字操何術飢雁聲聲和楚謳

災民多操小舟沿河旬食

長沙大風不得過江與賀六蔗農相見作此寄懷

旗腳風聲若嘯呼迢迢沙岸隔檣烏蓬池人散華年失

嶽麓寒深客夢孤青瑣言攀屈賈黃塵倦眼醒江湖

定王臺畔今宵月可有清懷付玉壺

銅官

三十六灣灣復灣沙瓶貰酒向銅官

借韻

一夜北風吹酒

醒舵樓吹笛看君山

盡日行湖汊中雞犬村落草葦木石皆無有也

淺水容刀一尺強平沙極望太蒼涼只餘些子供描畫
淡淡寒雲著雁行

除夕宿晃州

萬落千村爆竹同歎余鞭鞚尙怱怱愁生燭炧杯空後
歲盡雷驚雨駛中夜犬且放倦魂酣逆旅怕將節物話
鄉風癡鬟未解身爲客笑簇花枝壓鬢紅

壬寅元旦喜晴

大雪曉披灑凍雨夕沾濡客程迫窮年日日雨雪俱有
雷空震驚有風不驅除天公抱沈憂慘慘顏不舒地下
蟣蝨臣仰首空躊躇今晨僛被眠笑語聞田夫暉光彌

六合道是三冬無衣冠起再拜再拜上枝烏願爲呼力
士上天翻日車以彼積陽火曛曛滄海隅蛟鱗盡崩奔
戢戢伏靈誅妖涎不敢吐毒霧不敢噓三光布精朗萬
物遂昭蘇念此大歡喜擊缶歌且呼屠麻有餘瀝亟潤
詩喉枯

石生

鎮一

殷生

銘

行雪中數十里相迓同至谷腳

已二鼓矣

不辭鞍疲遲行旌老去門生倍有情廿載關河失青鬢
萬山風雪話殘更無多載酒元亨客頗憶煎茶試院聲
仕不去鄉吾所羨正宜微祿代躬耕

二生皆
爲教官

蘇臺

千秋佳麗地歌舞屬蘇臺
幸兵烽遠長看幕府開
玉闌宵振笛花舫午傳杯
聞道姚江上千家又劫灰

望遠

海雲東望路漫漫勝日登臨強自寬
翠墨有情磨老境青山如笑對閒官
歸耕村陌心空在力挽天河事大難
聞說將軍閒醉日春風鼓角滿江干

陳訥齋大令

文衡

貽牡丹芍藥感賦

蠻徼花偏繡纈攢幾枝投贈感春殘
清遊少日湖頭盛小圃東風火後寒
近事頗驚鞞鼓急誰家能把酒杯看

傾城顏色翻階態愁傍天涯獨倚闌

過李夢韶鈞廉訪夢草池上

池光一鏡平客至鶴長鳴
竹吹新粉春蟲撲晚晴
徑隨城堞轉雲傍石闌行
睡起詩奇絕烟絲芳草生
白鷗能款客春水共淹留
不謂風塵際翻同濠濮遊
看山發遐想得酒破長愁
露下芙蓉夕相期此泛舟

憫黔民

窮山地已開荒盡豐歲人猶乞食多
未免隱憂防鈔掠正宜下考拙催科
飲冰茹檗知誰是剗肉醫創奈爾何
雨霰莫愁無短褐已吹春律動陽和

遊雪嵯洞登來仙閣晚眺

朱符墨牒判易了筇屨疏肥貪午飽閒官只合作清遊
況是看山晴最好雪厓近在城南隅石竅庠豁含清虛
恨無奇境闢奧窔但有古佛常跏趺長廊森森萬綠裏
風葉舉舉交婀娜餘花幾點不成春已老鶯聲啼向我
欲窮望眼登高閣面面山如青鐵削中央如礪不全平
天遣何年著城郭舊時遊跡墮渺茫廿載身名仍寂寞
旁人指點說頑仙三度飛來健黃鶴余已卯典黔試癸未復由黔入滇今
三至 曖曖春烟向夕生鱗鱗新水漲南明沈吟獨客憑
闌久門外夕陽流磬聲

夢韶餉茅苔酒

茅苔村名
隸遵義府

君才如于公怡獄醉益明我視何水曹劣能識杯鐏點
人鬻酒味多濁更有竿兒陋苗俗那似江南玉色醪麴
香泉冽乘春熟頗聞釀法出茅苔千山萬嶺焉得來鳴
鞭走送獨不惜遂使病叟顏爲開出不慕鐘鼎歸不慕
園廬有酒直須酌一酌輒陶然柳花亂舞來勸客今日
正放春風顛君不見春風去來成百年白日又落西山
前

鳳羽硯歌

并序

鳳羽地名隸滇之太和縣產石中硯材宮明府

思晉嘗琢一硯貽余歷十九寒暑矣硯固無恙
而宮君之墓已有宿草開匣檢視悽然作歌

鳳羽山中雲一片磨刀割雲規作硯年年判牒復哦詩
啓匣摩挲墨花徧非端非歟質不奇我意重是故人貽
故人意態最清狂相招躍馬遊點蒼酒酣日落弔蒙段
淋漓墨汁書滿牆後來學畫畫輒就謁我濠州攜滿袖
真手真硯足相敵可歎百年無硯壽君不見淮南大小
山八公一去不復還青桂叢叢化茅菅可有遺跡留人

間我將問硯石不言蟾蜍之淚流潺潺

宮鳳陽人

五月十日長孫

文瑞

生喜而有作

老去抱孫真慰意廿年前事一般情

辛巳余舉子于京師先大夫方解組

歸里聞之喜甚書來命名春杰

七旬人健初歸里千里書來爲命名我

喜蘭芽重擢秀客嘲甘蔗是旁生燈窗絮語山妻笑笑

指榴花屋角明

春杰亦五月生小名榴生

九日遣興

愁心滿江海萬里畏登臨決勝嗟何術傳聞恨轉深鵠

鷗啼廢堞燐火散秋陰野菊知仍好誰能倚醉吟

荆部波濤濶村村鴻雁聲如何淮浦上秋水復縱橫轉

漕官符迫防江使節明諸公恩寵極努力荅承平

冠蓋成高會東山廿四年

已卯典黜試事

殘僧識名姓春夢捲

風烟拙任時人笑，衰憑弟子憐。飛騰今已矣，得酒亦欣然。

越酒今難得。

嘆夷入江後，估舶不通南酒，遂無至點者。

黃花怪不歸，救時心

已負竊祿計，終非伏枕空。憂國耽書易，忍飢家人報消

息松櫪近成圍。

翠微閣秋望

在城南觀音寺

白雲從何來，曉雨灑然作。僧房鐘未動，樵澗葉初落。冥濛飛鳥外，寒翠抱高閣。下枕南明河，急溜漱厓嶠。筒車竝村喧，漁舸過橋泊。地近得清遊，心寂解塵縛。未須嗟遠宦，風景良不惡。

鐵柱篇

并序

南明河南岍有甲秀樓樓前鐵柱二長十尺有
奇一稍殺下無礎上有蓋四圍鑄字凡六行西
林鄂爾泰公宜軒勒保公平苗紀功也鄂桂銘
曰帝德光被臣功赫煜八萬古州生苗貼服鎔
干銷戈鐵柱矗矗表烈垂謨載瞻載肅勒柱銘
曰聖武維揚誕及蠻荒興義洞洒撻伐用彰功
成錫爵苗俗安良勦撫永制銘柱重光

一柱鑄自乾隆年相公仗鉞來開邊古州八萬古化外
上下九股相鉤連自從雍正始命將危厓大箐驅戈鋌

幾回獮薶置郡縣中間叛服殊紛然一柱千支紀嘉慶
叢爾南籠苗逆命文臣瑟縮久養癰妖人煽誘苗人聽
王師皦皦自楚來小醜跳梁更戡定八月十五覆賊巢
刀光月光夜相映屹然兩柱銘厥功細論難易未必同
要知

三聖布神化早看魑紒成華風磨風蠹雨鐵花裂天陰
鬼語聞嗚咽或云此鐵非是鐵乃是千人萬人血鑄爲
錢鑄力可任官吏擾農愁苦深廉威所被羣苗服我願
鑄爲良吏心

賀藕畊中丞將以元日禱雪龍祠同用東坡禱雨

張龍公得雪飲聚星堂詩韻

壬寅除夕

十月黔山微脫葉龍公先試頭番雪冬深氣暖放老晴
蠻霧昏嵐埽俱絕山耕确确龜圻深圃汲勞勞鹿盧折
驟聞雨急土膏融喜抵雪深牛跡滅中丞望歲尚精禱
戊夜琅然閣鈴掣但願麴麥甦陳荻肯戀屠麻迷醉顙
會看喜氣入新桃萬戶千門慘瓊屑何須古潭問蛻骨
呼吸感通真一瞥百穀時熟民樂康歲朝吉語人爭說
亟爲傳告山中人好趁場期買犁鐵

用前韻呈李雙圃方伯

象鯤

夢韶廉訪索和

富體平稱詩累葉

先世自宋竹洲公以來多能詩者族叔錦孫刊竹洲秀衍集

帙帙

清詞炯冰雪慚予蹇劣艱負荷未忍風流歎中絕濁酒
燈前寄慨慷小絃花下聽廉折旗亭未唱價不高僧祇
會題字都滅可憐細響候蟲鳴不是雄才海鯨掣一從
汗腳走塵俗更將繡樣拋花纈無端般爾急徵材竹木
兼收頭與屑中丞督詩甚急心如智井口欲瘖坐歎華年去如
瞥由來賀監重謫仙詩家舊事吾能說詞鋒知爾千鎖
鈇不比尋常鑄凡鐵

憶去年除夕宿晃州愴然感賦仍用前韻

打槳渡頭舟似葉晃州城下吹殘雪滿城爆竹春雷聲
客舍光陰自清絕主人愛客重饋歲

攝州事李君鐸酌酒頻頻

燭花折眼前骨肉尙團圓
樂醉後牢愁暫消滅
宦遊苦味豈奇賜
天或余憐不余掣
豈知此境亦難再
倏忽空花散眼纈
竹篋塵棲怕點檢
糝盆火煖翻騷屑
平生空作放達語
向老真驚泡影瞥
一家生計那能了
卅年往事從誰說
布衾轉側不成眠
槭槭嚴飈動檐鐵

時王淑人歿已匝月

花宜館詩鈔卷之十終